

Date – 10/04/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. 'Ek Bharat Shreshtha Bharat' hmalakna hnuaiah Bihar, Rajasthan, Odisha leh Himachal Pradesh state dinchamphaphak lawmna nimin khan hman a ni.
2. PWD Minister Pu Vanlalhlana'n khawchhak tlangdung kawng thawmthat hnathawh a tlawhna ah khawtlang hmasawna rahbi thar kai turin khawtlang tanrual a ngaih thu a sawi.
3. Tourism Minister Pu Lalnghinglova Hmar chuan Mizoram tlawhtu pung zelah fimkhur taka khualzin dawnawm a tul thu a sawi.
4. India chuan Israel-in Lebanon a kah avanga civil mi engemawzat an thi chu pawl a tih thu a sawi.



'EK BHARAT SHRESHTHA BHARAT'

'Ek Bharat Shreshtha Bharat' hmalakna hnuaiah Larsap, General (Rtd) Vijay Kumar Singh, hovin Bihar, Rajasthan, Odisha leh Himachal Pradesh-te state dinchamphaphak lawmna Lok Bhavan Durbar Hall ah nimin khan hman a ni.

Larsap VK Singh chuan state danglam bik leh pawimawh tak pali Bihar, Rajasthan, Odisha leh Himachal Pradesh-te dinchamphaphak lawmna buatsaih a ni chu lawmawm a tih thu sawiin hemi pual hian duhsakna a hlan a. State tinte chuan danglam bikna leh thatna riau bakah theihna nasa tak an neih avangin hmasawna nasa tak an state ah a thleng a ti a. Ek Bharat Shreshtha Bharat hmalakna chu fakawm a tih thu sawiin, State leh UT-te dinchamphaphak inlawm sak tawn thin hmangin midangte hnam ziarang, nunphung leh tih dante an hriat thuk leh zual phah a, hei hian inpumkhatna siamin India chu ram danglam bik a nih zia a lantir a ti a. Danglamna nasa tak kara an inpumkhat tlatna chu kum 2047-a ram changkang leh intodelh, "Viksit Bharat" a India siam tura hmanraw pawimawh tak a nih thu a sawi a. Programme hlawhtlin theih nana tha thawhtu zawng zawngte chhuanawm a tih thu a sawi baw.

Ek Bharat Shreshtha Bharat programme hian India rama State leh UT hrang hranga cheng hnam hrang hrang, hnam ziarang leh nunphung inang lo tak takte inkarah inpawhna leh inunauna tha zawk hnam ziarang inhriatpawh tawna kaltlangin siam a tum a ni.



OIL & GAS

Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlna Gas leh tuialhthei chu Mizoramah a thleng tha a, mipui tan chia-na tur a awm lo tih an sawi.

Voicecast

Sawrkhar tarlan danin nimin April ni 10 thleng khan Mizorama LPG Distributor hrang hrangah Domestic (14.2Kg) bur 13924 a awm a, kawng laka thang mek bur 25465 nen a vaiin bur 39389 awm ang a ni a. Commercial (19Kg) chu Distributor-ten bur 613 an kawl bakah kawng laka thang mek nen avaiin bur 1021 a awm a. Petrol pawl Filling Station-ah Kilolitre 1251.10 awmin, kawng laka thang mek Kilolitre 484 nen a vaiin Kilolitre 1735.10 awm ang a ni a. Diesel chu Filling Station-a Kilolitre 1508.80 awmsa bakah kawng laka thang mek Kilolitre 596 nen a vaiin Kilolitre 2104.80 awm ang a ni.



PWD MINISTER

PWD Minister Pu Vanlalhlana'n khawchhak tlangdung kawng thawmthat hnathawh a tlawhna ah khawtlang hmasawna rahbi thar kai turin khawtlang tanrual a ngaih thu a sawi.

PWD Minister hian Vangchhia, Leithum, Dungtlang, Khawbung, leh Farkawn khaw chhung kawng thawmthat tur a ruahmanna kal mek chu a enfiah a, Farkawn khawtlang hruaitute kawmin khawtlanga hmasawna tak tak thleng tur chuan sorkar leh mipui tanrual a pawimawh ber tih a sawi a. Sorkarin sum tam tak sengin hmasawna hna thawk thin mah se, a hmun ngeia mipuite'n neitu rilru pu chungan thlawp leh an vil ve loh chuan hmasawna chu a tlo thei lo tih a tarlang a. Khawtlanga hmasawna rahbi thar kai tur chuan khawtlang hruaitute, tlawmngai pawl leh sorkar hnathawkte lungrual taka an tanrual a ngaih thu a sawi.



MERA GAON MERA GAURAV

Siaha District-a Krishi Vigyan Kendra buatsaihin nimin khan Noaotlah - III khuaah Mera Gaon Mera Gaurav model village hun hman niin Lei hrisel tura enkawl dan leh leitha pek dan inzirtirna hun hman a ni.

Nimina hun hmanah hian Krishi Vigyan Kendra, Siaha District lama mithiam ten zirtirna pein Soil testing tih dawna lei lak dante, dik taka leitha pek a pawimawh ziate, leilung da tawh leh chhe zel tur ven dante Farmers-te hnenah an zirtir bakah a taka entir theih chi chu a taka tihchhin nghal a ni.

He programme hi Siaha district chhung khaw hrang hrangah zirtirna neih chhonzawm zel tura ruahman a ni. Hun hmannaah hian Noaotlah - III (KM 10) khuua Lo/Huan neitute an tel tha hle a ni.

<><><>

TOURISM MINISTER

Tourism Minister Pu Lalngchinglova Hmar chuan Mizoram tlawhtu pung zel chu sum leh pai leh a tha zawnga Mizoram tarlan kawngah thil lawmawm tak ni mahse thil tha lo ken tel a neih theih avangin fimkhur taka lo dawnsawn a tul tih a sawi.

Nimina Tourism Department hotute leh Central Young Mizo Association hruaituten Mizoram tlawhtu khualzin pung zel lo dawnsawn leh inzirtirna kalpui kawngah thawhho theih dan tur an sawiho na ah he thu hi sawiin Pu Lalngchinglova Hmar chuan Mizoram tlawhtu pung zeloh fimkhur taka lo dawnsawn a tul tih a sawi a. Mizo hnam ziarang leh khawtlang nunphung ti dal si lova mikhual lo dawnsawn a, inven tulna kawngah lo inven theihna'n nasa taka zirtirna kalpui a ngaih thu sawiin YMA nen thawhho a tul thu a sawi a ni.

Central YMA President Pu R. Lalnggheta chuan Mizoram mipuite bakah tourist te hriattur pawimawh, an cham chhunga an tih tur leh tih loh tur mumal tak siam tha a tih thu a sawi.

Nimina inkawmhonaah hian inzirtirna kalpui chungchanga sawrkar leh Central YMA thawhho theihna hrang hrangte sawiho a ni a. Tourism kaihnawihha eizawng hrang hrangte bakah, tourist te hriattur pawimawh buatsaih leh sem thin a nih thu leh, YMA in ngaih pawimawh zawng a neih chuan sawrkar a inhawn thu tarlan a ni.

<><><>

SERCHHIP MHIP

MHIP Sub-Hqrs. Serchhip Conference chuan Mizo hmeichhia hnam dang pasal nei lo tura inzirtir uar nise tih an rel.

Conference vawi 13-na rorel inkhawmah hian Mizo hmeichhia hnamdang pasal neilo tura inzirtir chu uar zawka kalpui turin an rel a, Kum 2026 - 2027 budget atan cheng nuai 2 pawm niin Mizo thuum (Puan) bih chu inkhawm pawimawhah uar leh zual ni rawh se tih leh In leh a velah hmeichhiate chu taksa lang tam lo thei ang ber thawmhnaw inbel thin tura inzirtir uar ni rawh se tih bakah Mizo hmeichhia ten hnamdang mi pasal nei lo tura tu leh fate inzirtir uar tura hmalak an rel a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MZP FEDERAL COUNCIL

MZP rorelna sangber dawttu Federal Council vawi 60-na thukhawm chuan Mizoram-a Inner Line Permit (ILP) hman dan kalphung chu tun aia khauh zawk leh changkang zawka kalpui a nih theih nana hmalak an rel.

Federal Council vawi 60-na Ransam CK Resort-a neih ah hian MZP President Dr. C. Lalremruata chuan Mizoram-ah hnamdang (Vai) phalna neilo a lokal an tam thu sawiin hnam inhungbikna ILP venhim chu mitin mawhphurhna a ni a, ILP hmang tangkai tur leh check ngun leh zual turin hmalak a tul thu a sawi.

MZP President chuan Pi leh pute atanga Zofate luah chin ram rorelna pakhat hnuaia awm tih chu MZP-in kan kal pui reng a ti a. Zofate insuihkhawm chu an thil pum pawimawh tak ani tih sawiin theihtawp an chhuah zel dawn tih a sawi a ni.

MZP Federal Council ah hian Zirtirtu indaihlohna rualkhai zawka sem-ruak a nih theih nan nasa zawkin Sawrkarin hma la rawh se tih leh Mizoram State University din turah dik leh felfai taka hnalak a nih theih nan hmalak bakah Zirna In hrang hrangah Zounun Zemawi inzirtirna kalpui a nih theih nana hmalak te leh Common University Entrance Test UG/ PG Exam Center tam zawk Mizoram-ah a awm theih nan hmalak leh Mizoram College te'n Principal nghet an neih theih nan a tul angin Sawrkar-in hma la rawh se tih chu an pawm a ni.



DEPT OF EXPENDITURE SECRETARY

Sawrkar laipuaia Ministry of Finance hnuaia Department of Expenditure Secretary Pu Vumlunmang Vualnam chuan rampum huapin Mizoram chu crime rate hniamna leh hmun ralmuang ber pawl ani tih sawiin hmeichhiate an him thu a sawi.

Youth Recreation Center, Falkland-a Paite Meet a hmanpui na ah he thu hi sawiin Pu Vumlunmang Vualnam chuan Mizoram chu hmun ralmuang leh mipuite zalenna hmun ani a ti a, rampum huapin crime rate hniamna ani tih sawiin kawng engkimah entawntlak anni tih a sawi.

Secretary sawi danin Zofate hmasawn zelah Tawng thiam tam chu a pawimawh tih sawiin inpawhna tha tak ani a ti a, hnampui tawng chu thiam a pawimawh rualin mahni hnam tawng ngaihhlut reng erawh a pawimawh tih sawiin hnam ziarang chawisan kawngah theihtawp chhuah zel a pawimawh thu a sawi a ni.

Nimina hun hman hi 'Unity, Peace and share roots' tih thupui hmanga hman niin Mizoram Chief Secretary hlui Pu Haukhum Hauzel chu Meet thlengtu a ni a, Pu Vungzaman Valte, Principal Director General, Central Board of Indirect Taxes and Customs, Govt. of India New Delhi chu khual zahawm a ni a, Paite Meet 2026 ah hian Mizoram chhung hmun hrang hrang atangin palai sang khat vel an kalkhawm a ni.



INTER MINISTERIAL BRIEFING

India chuan Israel-in Lebanon a kah avanga civil mi engemawzat an thi chu pawia a tih thu a sawi. Inter-Ministerial Briefing-ah hemi chungchang hi sawiin External Affairs Ministry thupuangtu Randhir Jaiswal chuan kar hnih chhung inkahhai puan anih mek laia hetiang thil a thleng hi pawia a tih thu a sawia. India chuan remna leh muanna a awm theih nan theihtawp a chhuah chungin tun dinhmunah chuan boruak khirkhan tak a nih thu a sawi a. Ramin mahnia zalen leh inrelbawl a nihna chu inzahsak a tul thu a sawi bawka ni.

Hetihlai hian sawrkar chuan Asia khawthlang lam buai karah kawlpheha leh energy mamawh a san lai takin sawrkar chuan mipuite mamawh ang a hmu thei a ti a. Union Ministry of Power-a Secretary Piyush Singh chuan ramchhunga thermal power plant te tuang taka an thawh mek thu leh mamawh khawp lungalhthei a awm thu a sawi a.

Union Ministry of Petroleum and Natural Gas Joint Secretary Sujata Sharma pawhin LPG leh tuialhthei pekchhuahnaah harsatna a awm loh thu a tarlang bawka ni.

<><><>